

誠意伯劉文成公文集

六



太師誠意伯劉文成公集卷之十

後學麗水何鏗編校

古樂府

艾如張

有苑者林衆鳥萃之我欲張羅榛桔翳之旣礪我斧又飭我
徒孰是奧穢而不剪除爰升于虛以相乃麓有條我綱載秩
我目有鳥有鳥五采其章離離喈喈率彼高岡張之弗獲憂
心且傷寤寐懷思曷云能忘有鳥五采亦旣來止昭其德音
以相君子君子豈弟其儀是若艾而張矣云胡不樂

芳樹

蔚彼芳樹生于蘭池景風晝拂榮泉夜滋燁如其光炫于朱
曦含華吐芬嚶鳴滿枝君子有酒以遨以嬉羽觴交橫吹竹
彈絲相彼草木允惟厥時良辰易徂能不懷思沛其邁矣其
誰女悲

上陵

零雨霏霏亦降于桑愴恨中懷念昔先皇惟昔先皇創業孔
艱寤寐興懷能不永歎精靈安所體魄焉依幽明隔絕曷已
其思堂堂梓宮在彼高岡霜露是萃能不慨傷禮起由情將
情繫物溥斯索矣庶其罔闕郊社旣虔宗廟孔威上陵是申
式昭孝思

將進酒

有酒湛湛亦盈于觴酌言進之思心洋洋亦有兄弟在天一方安得致之樂以徜徉有酒在尊既旨且清何以酌之有觥其觥豈不欲飲惜無友生愴悵傷懷曷云其平兄弟之合如墳如篋朋友既比如網如維死喪急難是責是庇今日有酒如何勿思人亦有言解憂惟酒載惓載嘔亦孔之咎我觴維瓊我竿維玖以樂兄弟以宴朋友

上之回

上之回六龍矯捷光耀拂鷺鳥輜石闕匝棠梨揚靈旗縣月支天馬來宛居劓穆上玄釐穰穰坐明堂朝萬方翕披離王

燭光於億年樂未央

朱鷺

朱鷺來玉山巔
頽翁引燦臆
延朱鷺來絕流
轂飲赤水食丹
砂朱鷺來炎德
加威昆明滇
焚訛朱鷺來集
太液帝錫祐荒
廣斥朱鷺來燁
煌煌挾鷦鷯媒
鳳凰朱鷺來皇
之輝神筵演無
窮期

巫山高

巫山高哉鬱崔嵬
下有江漢浮天回
深林日月照不到
洞谷闔闔生風雷
危峯半出赤道上
落日猿狖鳴聲哀
虎牙赤甲闔雄壯
風氣以之而隔閼
楚王遺跡安在哉
但見麋鹿跳蒿

萊當時忠臣放澤畔乃與靳尚相徘徊山中妖狐老不死化
作婦女蓮花腮潛形謫跡託夢寐變幻涕泪成瓊瑰神靈震
怒不可禱雲霧慘淡昏陽臺猛風吹雨洗不盡假手秦炬歎
飛灰精誠感應各以類世間妖孽匪自来君不見商王夢中
得良弼傳巖之美今安匹巫山何事近楚宮終古怨恨流無
窮

戰城南

朝戰城南門暮戰城北郭殺氣高衝白日昏劍光直射旄頭
落聖人以五服限夷夏射獵耕織各自安土風胡為彼狂不
自顧而與大國爭長雄高帝定天下遺此平城憂陛下宵旰

不遑食擁旄仗鉞臣不羞登南城望北土雲茫茫土膻膻蚩
尤禡牙雷擊鼓舉長戟揮天狼休屠日逐渾邪王羶車尾尾
連馬羊橐駝載金人照耀紅日光逍遙而來歸帝鄉歸帝鄉
樂熙熙際天所覆罔不來小臣獻凱未央殿陛下垂拱安無
為

君馬黃

君馬黃我馬驪二馬八足爭驅馳回頭顧影雙驕嘶尾端散
作蜺虹飛黃馬曜日黃金晶驪馬謂是玄天精眼前好醜那
能明吾聞良驥稱以德不聞矜此驪黃色世無伯樂識者誰
有德無色空自知

思悲翁

弱齡輕日月邁景想神仙顧徃諒無及待來徒自憐黃金棄
砂礫劬心鍊丹鉛鑿石不得水沉劍徒窺淵流光不我與白
髮盈華顛杖策出門去十步九不前歸來對妻子塵甌午未
煙干時乏計策退畊無園田霜蒲怨青松逝矢恨驚弦已矣
復何道吞聲赴黃泉

聖人出

聖人出臨萬方赤若白日登扶桑陰靈誦精星滅芒群氛辟
易歸大荒晻曖寒谷熙春陽枯根發茁暢幽藏潛魚躍波谷
鳥翔花明草暖青天長青天長聖人壽北斗軒轅調氣候北

辰中居環列宿八風應律九歌奏圓方交格神靈輳聖人出
陽道開億萬年歌康哉

釣竿

斫竹作釣竿抽蠶作釣絲滄洲日暖波連漪綠蒲茸茸柳葉
垂鉤纖餌香魚不知石鱗激水溪毛動玉燕廻翔竿尾重大
魚入饌腮頰紅小魚却放淵沚中更祝小魚知我意長逝深
潭莫貪餌

思美人

雨欲來風蕭蕭披桂枝拂陵若繁英隕鮮葉飄揚煙埃靡招
搖激房帷發綺綃中髮屑懽寂寥思美人隔青霄水渺茫山

碧峩雲中鳥何脩脩欲寄書天路遙東逝川不可邀芳蘭花
日夜凋掩瑤琴閑玉簫竟眾眾心搖搖望明月歌且謠聊逍
遙永今宵

閔山月

閔山月明風惻惻萬里黃雲雜沙礫夜深羌笛吹一聲征人
相看淚沾臆古人以綏服奮武衛耕戰守禦不外求何人倡
此戍邊策千載以貽中國憂閔山月圓復缺何忍年年照離
別願得馳光照明主莫遣邊人望鄉苦

楚妃歎

江漢揚波六千里上有巫山矗天起錦衾一夕夢行雲萬戶

千門冷如水聞道秦兵下武關君王留連猶未還山深不見
章臺殿汨羅冤淚空潺湲尚憶前王好馳逐宮中美人不食
肉回狂作哲須臾間至今相業歸孫叔楚宮無復如昔人况
有神女如花新悲來恨新還憶故誰能斷却巫山路

上清詞三首

王子晉好吹笙吹得神仙下玉京一朝羽化隨風去回首故
宮芳草生

天上月影悠悠似鏡看看又似鉤自是嫦娥甘寂寞桂華相
對度千秋

河漢水九秋清涼月滿空聞鴈聲鴈聲不到夢先到白露濕

衣天未明

漢宮曲

小雨如烟晝掩扉捲簾忽見燕雙飛不知春色能多少總向
昭陽柳上歸

江上曲八首

數樹垂楊綠水邊問郎何不繫蘭缸浦沙新漲青山遠半夜
月明無杜鵑

曾記樓船夜泊時家家絃管闌腰肢于今絃管歸何處綰束
枯蒲當酒旗

昨夜月明天似水今晨月落水如天天長水遠人何處蘆葦

蕭蕭一抹烟

紫桂香銷五夜霜
碧雲收盡玉蟾光
琅玕不是人間樹
何處朝陽有鳳凰

月出前山青黛寒
鴈聲遙下碧雲端
草根錯認驪珠吐
自是西風白露團

賓鴈來時月滿洲
于今鴈去月如鉤
鴈來鴈去何時了
月照離人又白頭

憶見垂楊縋綠絲
陡看秋菊映疎籬
柳花作絮隨風去
菊綻金葩欲似誰

紅蓼丹楓一色秋
楚雲吳水共悠悠
人間萬事西風過
惟有

滄江日夜流

寒夜謠二首

良夜悠悠星河滿天風吹窓櫺聲如管絃無酒可飲寒不能
眠枯腸飢鳴百慮交煎人生一世不滿百年寤寐懷思曷維
其然內省不疚有愧聖賢

今夕何夕歲聿其徂草木凋落山川縈紆瞻彼鴻鴈拂翼天
衢雖離和鳴載悠載徐雖無羽翰心與之俱華月出雲青銓
在隅歌以寫懷云何其吁

夜夜曲

冬夜恒苦長夏夜恒苦短短長相蔽虧殷勤望推挽綢繆作

繩繩易斷汲水作池池易旱故鏡塵昏難遠照故衣絮敝無
新暖西風嫋嫋吹桂枝白露點苔黃葉滿

秋夜曲

木落霜露繁鳥啼夜方永起行望明月西風吹鴈影鴈飛一
何急烏啼安所集徘徊不能寐望月空佇立佇立河漢傾誰
家砧杵聲關山渺千里何處不傷情

長歌續短歌

短歌調促情苦悲長歌引愁無絕期短聲欲盡長聲續似是
荆山人泣玉悲哉荆山泣玉人但知貴玉不貴身縱令哭盡
歌堪聽何異春花委路塵古稱悲歌可當哭傷心如中金石

鏃更不必聽蔡琰笳又不必聽漸離筑長歌飄揚徹九天短歌嗚咽入九泉徒言歌哭兩情異誰知歌聲尤可憐

牆頭花

牆頭花紅錦妬美人抱瑟倚高樓只恐花飛逐風去
熒熒絳蠟送殘宵燕語鶯啼斜日暮

望行人

朝聽乾鵲鳴暮見燈花結鵲鳴燈結無定期鏡裏青雲看成雪
人生百歲難長保天上孤鸞海中老滔滔逝水不回西灼灼秋花幾時好一朝復一朝一夕復一夕只恐君心念妾時
妾身已作山頭石

長松梢

長松梢青拂天歲暮商飈急寒苦令人憐陰崖有樸檖生在
荊棘下霜凋荊棘葉網綴如簷瓦春風破冰凍勁綠不曾赭
禍福相倚伏豈不在所招寧為樸檖莖莫作長松梢

折楊柳

東風二月春如酒不見百花惟見柳柳絲綰烟留暝鴉柳花
蕩漾迷羲和美人捲簾看不足柳色萋萋妬娥綠夜來微雨
清郊圻鶯黃相應鳴塤篴欲寄柔條無信使空將淚染回文
字

王子喬